



SAKSFRAMLEGG

Saksnr:	Utval:	Dato
13/2023	Formannskap/plan- og økonomiutvalet	17.01.2023

Sakshandsamar:	Arkiv:	ArkivsakID
Tore Henrik Øye	FA-V24, FE-223	22/582

SØKNAD OM TILSKOT TIL KLAUVBOKS FRÅ VAKSDAL KOMMUNALE NÆRINGSFOND

Vedlagte saksdokument:

Søknad om tilskot - klauvboks
kvittering klauvboks gaute
Tilhenger klauvboks

Kommunedirektøren sitt framlegg til vedtak:

Formannskap, plan og økonomiutvalet (FPØ) løyver inntil kr. 158 970,- i tilskot frå Vaksdal Kommunale Næringsfond til føretaka Annika Nottberg Brønstad og Gaute Øvstedal til innkjøp av klauvboks med tilhengar, for klauvskjering av storfe i næringssamanheng.

Løyvinga er gjeve med bakgrunn i fondsvedtektene § 2 «Formål».

Tilskotet utgjer 30 % av godkjent kostnad på 529 900,- eks. mva.

Tilskotet vert betalt ut etter innsendt sluttrapport med kostnadsdokumentasjon.

Løyvinga gjeld til og med 01.10.24. Etter dette vert tilskotet trekt attende.

Saksopplysningar:

Samandrag/konklusjon (kort om saka)

Vaksdal Kommunale Næringsfond skal nyttast til å fremje næringsføremål i kommunen i tråd med fondsvedtektene § 2 «Formål».

Formannskapet-/plan- og økonomiutvalet (FPØ) er fondsstyre, og tildeler midlar etter innstilling frå administrasjonen.

Landbruksføretaka Annika Nottberg Brønstad og Gaute Øvstedal har gått til innkjøp av hydraulisk klauvboks med tilhengar, for å tilby klauvskjering av storfe i næringssamanheng. Samla kostnad med investeringa var kr. 529 900,- eks. mva, fordelt på kr. 467 900,- for klauvboksen og kr. 62 000,- for tilhengaren.

Det vert søkt om kr. 264 950,- i tilskot, som utgjer 50 % av innkjøpskostnaden.

Kommunedirektøren går inn for å løyve inntil kr. 158 970,- i tilskot frå næringsfondet (30 % finansiering).

Bakgrunn for saka

Vaksdal Kommunale Næringsfond skal nyttast til å fremje næringsføremål i kommunen , inkludert primærnæringa. Prosjekt/tiltak som medverkar til nyskaping og moglegheit for sysselsetting, skal prioriterast, jf. fondsvedtektene § 2.

Fondsstyret, ved Formannskapet/plan- og økonomiutvalet (FPØ), fattar vedtak om løyving frå fondet, etter innstilling frå administrasjonen.

I søknad av 30.10.22 søker føretaka Annika Nottberg Brønstad og Gaute Øvstedal om kr. 264 950,- i tilskot til felles innkjøp av hydraulisk klauvboks, med tilhengar, for klauvskjering av storfe i næringssamanheng. Boksen er av typen «KVK Hydra Klov».

Klauvboksen kosta kr. 467 900,- eks. mva, medan tilhengaren kosta kr. 62 000,-. Søknadsbeløpet utgjer 50 % av samla kostnad på kr. 529 900,- eks. mva. I tillegg har søkjarane utgifter med ulike bruksvarer, som bandasje, skiver, medisin og liknande, pluss transportkostnader.

Klauvboksen vart kjøpt inn i 2022, og er teken i bruk.

I følgje «Forskrift om hold av storfe», skal storfe ha forsvarleg klauvstell, regelmessig. Dette skapar behov og etterspurnad for tenesta blant husdyrhaldarar. Målsetjinga med investeringa er soleis å tilby klauvskjering som tilleggsinntekt til føretaka si tradisjonelle gardsdrift, høvesvis på Flatekval og Nesheim i Eksingedalen.

Det går fram av søknaden at søkjarane ha teke kurs for å lære seg klauvskjering best mogleg, i tillegg til tidlegare praktisering.

I følgje søkjarane vil investeringa styrkje og betre tilbodet i Eksingedalen og distriktet elles. Behovet er stort, og den moderne klauvboksen vil leggje til rett for effektiv og skånsam handtering av dyra. Intensjonen i dette høvet er å marknadsføre eit stabilt og fagleg godt tilbod, med rask levering etter ønskje og behov.

Det vert opplyst at prisen for klauvskjering er kr. 225,- per kyr, med stipulert skjering av 1000 kyr per år.

Det kom inn 9 søknadar til søknadsomgangen i november 2022, med ein oppgjeven søknadssum på kring 2,2 millionar kroner, jf. oversyn som orienteringssak til sakshandsaminga. To av søknadane hadde ikkje spesifisert søknadsbeløp.

Formelt grunnlag:

Vedteker for Vaksdal Kommunale Næringsfond, revidert av kommunestyret den 14.06.22.

Vurdering og konsekvensar:

Søknaden er vurdert å vere tilstrekkeleg opplyst for sakshandsaming og vedtak, jf. vedtektene § 4 «Stønadsvilkår». Søkjarane innfrir kravet til å vere næringsdrivande, med registrerte føretak i Brønnøysundregistrene, jf. § 2 fjerde avsnitt.

Kommunedirektøren vurderer at investeringa i hydraulisk klauvboks er i tråd med næringsfondet sitt føremål om å fremje næringsverksemd hos føretaka som søker, jf. § 2. I gjeldande høve handlar

dette om gardsdrift i Eksingedalen. Her vert innkjøpet sett som ei ekstra satsing, med moglegheit for tilleggsinntekt til tradisjonell gardsdrift.

I følgje vedtektene § 2 tredje avsnitt, kan midlane frå fondet berre nyttast til investeringar i varige driftsmidlar eller andre produksjonsfremjande tiltak. I dette høvet vert gjeldande investering sett på som eit varig driftsmiddel, og tiltaket vert ikkje vurdert som konkurransevridande.

I følgje vedtektene kapittel 4 skal samla finansiering frå fondet, som hovudregel, ikkje overstige 30 %, eller kr. 300 000,- av den totale kapitaltrongen for eit prosjekt.

I søknaden vert det søkt om kr. 264 900,- i tilskot, som utgjer 50 % av innkjøpskostnaden. Innkjøpet er knytt til investering for framtidig inntekt gjennom tenestetilbod, og ut frå stipulert bruk (1000 kyr/år), vil den årlege omsetjinga verte kring kr. 225 000,- (svært omtrentleg). Dette viser høvet for relativt rask kostnadsdekning og økonomisk lønsemd.

Kommunedirektøren tek utgangspunkt i investeringskostnaden og grunnlaget for framtidig inntening som vurderingspunkt ved handsaming av søknaden. I dette høvet er det grunn til å tru at stabil/aukande etterspurnad etter tenesta over tid, vil kunne leggje grunnlag for overskot etter relativt få år, noko som gjev eit uttrykk for finansieringsbehovet. På den andre sida vert verdien av å gje starthjelp til tilbod som kan styrkje eksisterande næringsdrift, vektlagt ved handsaming av innkomne søknadar.

På bakgrunn av momenta ovanfor vert det tilrådd å løyve kr. 158 970,- i tilskot til innkjøp av klauvboks med tilhengar. Denne tildelinga vil utgjere 30 % av total kostnad, og kr. 105 980,- mindre enn kva det vert søkt om.

Framlegget til stønadsbeløp er i tillegg til tiltaket sin karakter, vurdert i høve til andre innkomne søknadar, saldoen til fondet og tilgjengeleg fondskapital (frie midlar).

I vurderinga er det også tatt høgde for at klauvboksen er kjøpt inn, og teken i bruk. I utgangspunktet ville det vore naturleg å finansiert innkjøpet gjennom Vaksdal Landbruksfond, men fondet har ikkje vore disponibelt for tildeling dei siste åra, grunna kravet til bunden kapital (1,7 millionar). Fondet, med fondssaldo, er no overført til næringsfondet, og midlane er soleis gjort tilgjengelege for tildeling.

Konklusjon:

Kommunedirektøren gjer framlegg om kr. 158 970,- i tilskot frå Vaksdal Kommunal Næringsfond til innkjøp av klauvboks for klauvskjering av storfe i næringssamanheng. Dette som grunnlag for tilleggsinntekt til tradisjonell gardsdrift.